



partii naleraq

14.april 2016

UPA2016/117

Inatsisissatut siunnersuut: Timersorneq timigissarnerlu pillugit Inatsisartut inatsisaat nr. xx, xx. xx 2016-imeersoq

Timersorneq timigissarnerlu pillugit inatsisissaatut siunnersuut Partii Naleqqamiit oqaaseqarfignissavarput.

Nuannerpoq timersornermut inatsisissamik Naalakkersuisut saqqummiussaqaqarnerat, tassami ulluinnarni inuunermik timersornikkut periarfissaat pitsaasuunissaat inuunerissaarnissamut sunniuteqartorujussuusarmata, pingaartumik pinaveersaartitsineranut sunniutai annertuujusartut meeqqat inuusuttut inersimasullu eqqarsaatigalugit.

Taamaattumik iluarisimaarnarpoq timersornerup immikkut inatsisiliullugu siunnersuummik saqqummiussisoqarmat.

Timersornikkut periarfissat pitsaasuunissaat taamatullu timigissarnermi atugassat, aammalu unamminermi peqquserluttoqannginnissaanik kiisalu nukkassaatinik atuinerup pinngitsoortinniarnissaanik nakkutilliinermik ingerlatsisoqalernissaanik aammalu kommunit aningaasalersuinikkut pisussaaffilerneqarnissaanik inatsisissami saqqummiunneqartut ajunngivissutut nalilerpagut.

Nunatsinni timersortarfiit atugaanerat isigigaanni annertoorujussuarmik atorneqarput, aammalu aserfallakkiartuinnarput kommunit namminersorlutillu oqartussat aningaasalersuinikkut ilaangippata nutarterinissamut akiliisinnaanerat aammalu ilaatigut akissaqartoqarneq ajormat, periarfissatuamikkut sukut tamaana taamaallaat aserfallatsaaliinikkut timersortarfinni ingerlasoqartarluni tamannalu tulluarunnaarluinnarpoq.

Tassami silami timersorfiusinnaasut periarfissallu killeqarput pitsanngorsartariaqarlutillu, taamaattumik illorsuit timersortarfiit pingitsoorneqarsinnaanngivippat, soorlumi assersuutigalugu silami arsaattarfiilluunniit takugaanni ukiorpassuarni allanngortoqarnikuunngilaq, tamakkulu ilanngullugit naleqqussartariaqalerput.

Kisiannili qujanartumik ivigaasanik arsaattarfeeqqat amerliartorput, taakkuli tamakkiisumik atorneqarsinnaanngillat pissartanngorniulluni arsaalluni unammisarnerit eqqarsaatigalugit.

Arsaattarfiit silami pitsannqorsarneqarnissaat eqqarsaatigalugu ilaatigut silami arsaattarfiliornissaq Anders Olsen-ip siunnersutaa pillugu misissuineq sumut killinnersoq paaserusunnarpoq, aammalu namminneq kajumissuseq tunngavigalugu Ilulissani nutaamik timersortarfimmik qulisamik arsaattarfilimmik sanasoqarniarnera Naalakkersuisunik malinnaaffigineqarnersoq ilanngullugu paaserusupparput tassami soqutiginarluinnarmat illorsuup piviusunnngortinneqarnissaa.

Aammalu Ilulissani pilersinniarneqartumut Qaasuitsup kommuniata aamma aningaasatigut tapersersuilluni nalunaaruteqarnera aamma iluatinnarluinnarmat.

Aningaasalersuinikkut periarfissat peqatigiiffinni ingerlatsisut ilungersunartutut oqariartuutigisartagaat neriutigaarput pitsaanerulissasoq, tassami massakkut aamma aningaasalersuinikkut periarfissat atortinneqartut sulii pitsaanerumik atugassaqaqarfiunissaat inatsisissami saqummiunneqartut iluarisimaarpagut.

Aammalu kommunip ukiumoortumik timersornikkut sungiffimmi kulturikkullu pilersaarusiortarnissaanik nunaqarfiit illoqarfiillu eqqarsaatigalugit assut taperserusunnarpoq tassami nunaqarfiit eqqarsaatigissagaanni missukutaanerit annertuujummata malunnartorsuarmimmi illoqarfinni aningaasalersuinerit kisimik pingaernerpaamik ingerlanneqartarmata.

Kiisalu iluarisimaarparput timersornikkut sungiusaasut aningaasarsiaqalernissaanik tapiissuteqaqarfigineqarsinnaanngussapput, inatsisissamut ikkussaqaarneq taamaalilluni pingaartumik meeqqat timersorlutik sungiusaasoqartarnerat sulii ullumikkornit pitsaanersumik inissinneqartussanngussammata.

Timersortartut kattuffiat aamma nersualaarusupparput ilaasortarpassuani sapinngisamik pitsaasumik atugassaqaqartinneqarlutik timersornikkut aallussiuarnissaat ilungersuuttuarmagu.

Kiisalu AWG ingerlanneqarnerani nunatta takutitsilluarnera nersualaarusupparput timersortartut pikkorissut angusarissaarneranni pilluaqquagut aammalu suleqataasorpasuit tamaasa nunarput kusanartumik takutimmasuk qutsavigalugit.

Taamatut oqaaseqarluta siunnersuut soqutiginarpoq, timersorneq timigissarnerlu pillugit inatsisissaq kultureqarnermut ataatsimiititaliami suliarineqarnissaa innersuussutigaarput.

Hans Enoksen